

【经文信息】大正藏第 21 册 No. 1255a

佛说摩利支天菩萨陀罗尼经 1 卷

No. 1255

佛说摩利支天菩萨陀罗尼经

大兴善寺三藏沙门不空奉 诏译

如是我闻。一时佛在舍卫国祇树给孤独园。与大阿罗汉千二百五十人俱。复有无量大菩萨众。弥勒菩萨。曼殊室利菩萨。观世音菩萨。而为上首。及摩利支等诸天。龙八部前后围遶。尔时舍利弗即从座起。偏袒右肩右膝着地。合掌向佛。而白佛言。世尊于未来世。末世众生作何等法得脱诸难。

佛告舍利弗。谛听谛听。我今为汝说于此事。尔时会众欢喜踊跃。重劝请佛。

尔时世尊告诸比丘。日前有天。名摩利支。有大神通自在之法。常行日前。日不见彼。彼能见日。无人能见。无人能知。无人能捉。无人能害。无人欺诳。无人能缚。无人能债其财物。无人能罚。不畏怨家能得其便。

佛告诸比丘。若有人知彼摩利支天名者。彼人亦不可见亦不可知。亦不可捉亦不可害。亦不为人欺诳亦不为人缚。亦不为人债其财物。亦不为人责罚。亦不为怨家能得其便。

佛告诸比丘。若善男子善女人知彼摩利支天名者。应作是言。我弟子某甲知彼摩利支天名故。无人能见我。无人能知我。无人能捉我。无人能害我。无人能欺诳我。无人能缚我。无人能债我财物。无人能责罚我。亦不为怨家能得我。此呪有大神力。所作成就。破一切恶。若用结界百由旬内一切诸恶无敢入者。尔时世尊即说呪曰。

南无佛陀耶(一)南无达摩耶(二)南无僧伽耶(三)怛侄他(四)遏啰迦末斯(五)摩啰迦末斯(六)苏途末斯(七)支钵啰末斯(八)摩诃支钵啰末斯(九)摩利支夜末斯(十)安怛陀那夜末斯(十一)那谟粹都底(十二)莎诃(十三)

王难中护我。贼难中护我。行路中护我。失于道路旷野中护我。昼日护我。夜中护我。水难中护我。火难中护我。罗刹难中护我。荼枳儻鬼难中护我。毒药难中护我。佛实语护我。法实语护我。僧实语护我。天实语护我。仙人实语护我。

怛侄他(一)阿罗拘隶(二)阿嚧拘隶(三)鸡栗底(知约反四)萨婆迦嚧酰蔽(蔽亚反下同五)萨蒲跋突瑟[齿*齐](二合)蔽(六)萨婆伊都波达罗鞞蔽(七)嚧(上音)叉嚧(上音)叉(自称名字八)莎呵(九)

奉请摩利支天呪。一名摩利支天身呪。呪曰。

娜谟嚧跢那(二合)跢嚧(二合)夜耶(一)摩唎支唎驮(去音)耶(二)摩婆(上)帝移沙(上)弥(三)跢侄他(四)婆(上)嚧(去)梨(五)婆驮梨(六)婆嚧呵目溪(七)萨婆(上)徒瑟誓(去二合八)盘(上)驮盘(上)驮(九)娑婆呵(十)

佛告诸比丘。若有人识彼摩利支天菩萨者。除一切障难王难贼难。猛兽毒虫之难。水火等难。若人欲行此法者。一切法中此法最胜。持此呪者面向百踰阇那。一切鬼神恶人无能得其便者。若于难中行时。晨起诵前身呪。呪一掬水。四方散洒及洒自身。若衣襟若衣袂若袈裟角。一呪一结总作三结。即往难中行连诵前二大呪而行。所有一切事难军防主者悉皆迷醉。都无觉知之者。

佛说是经已。告诸比丘比丘尼。优婆塞优婆夷。国王大臣及诸人民等。闻佛说是摩利支天陀罗尼。一心受持之者。是人不为一切诸恶所害。诸比丘若有人。能书写读诵受持之者。若着髻中。若着衣中。随身而行。一切诸恶悉皆退散无敢当者。是诸四众天龙八部礼佛而退。欢喜奉行。

佛说摩利支天菩萨陀罗尼经

【经文信息】大正藏第 21 册 No. 1255a 佛说摩利支天菩萨陀罗尼经

【版本记录】CBETA 电子佛典 Rev. 1.6 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

